

Na osnovu člana 17. Zakona o Vijeću ministara Bosne i Hercegovine („Službeni glasnik BiH“, br. 30/03, 42/03, 81/06, 76/07, 81/07, 94/07 i 24/08), a u vezi sa članom 12. Zakona o ministarstvima i drugim organima uprave Bosne i Hercegovine („Službeni glasnik BiH“, br. 5/03, 42/03, 26/04, 42/04, 45/06, 88/07, 35/09, 59/09 i 103/09), a u vezi sa poglavljem V Akcionog plana za djecu Bosne i Hercegovine (2011 – 2014), Vijeće ministara Bosne i Hercegovine, na 30. sjednici održanoj 4. 12. 2012. godine, donijelo je

ODLUKU O FORMIRANJU VIJEĆA ZA DJECU BOSNE I HERCEGOVINE

Član 1. (Predmet Odluke)

- (1) Ovom Odlukom, u cilju izvršenja obaveza koje ima Bosna i Hercegovina u vezi Konvencije Ujedinjenih naroda o pravima djeteta i njena dva fakultativna protokola, formira se Vijeće za djecu Bosne i Hercegovine (u daljem tekstu: Vijeće za djecu) kao stručno, interresorno, savjetodavno i koordinirajuće tijelo Vijeća ministara Bosne i Hercegovine (u daljem tekstu: Vijeće ministara).
- (2) Vijeće za djecu djeluje pri Ministarstvu za ljudska prava i izbjeglice Bosne i Hercegovine (u daljem tekstu: Ministarstvo za ljudska prava).

Član 2. (Nadležnost i djelokrug rada)

- (1) Nadležnost, djelokrug rada i odgovornosti Vijeća za djecu su:
 - a) promocija i zaštita prava djeteta;
 - b) iniciranje i aktivno učestvovanje u izradi i monitoringu strateških, planskih i akcionih dokumenata iz oblasti prava djece u Bosni i Hercegovini;
 - c) uspostava saradnje i koordinacije između svih nosilaca implementacije Akcionog plana za djecu Bosne i Hercegovine (2011 – 2014);
 - d) izvještavanje Vijeća ministara o stanju, problemima i aktivnostima u oblasti prava djeteta u Bosni i Hercegovini;
 - e) priprema izvještaja, stručnih analiza, inicijativa, preporuka i mišljenja u vezi sa konkretnim mjerama i mogućim rješenjima za dobrobit djece i zaštitu njihovih prava koja putem Ministarstva za ljudska prava dostavlja Vijeću ministara;

- f) uspostava redovne saradnje sa Odjelom za praćenje prava djeteta u okviru Institucije ombudsmena za ljudska prava Bosne i Hercegovine i Zajedničkom komisijom za ljudska prava, prava djeteta, mlade, imigraciju, izbjeglice, azil i etiku Parlamentarne skupštine Bosne i Hercegovine;
 - g) uspostava saradnje i partnerstva sa domaćim i međunarodnim vladinim i nevladinim organizacijama i akademskom zajednicom koje se bave promocijom i zaštitom prava djece, kao i sudjelovanje u svim projektima koji se iniciraju u interesu djece;
 - h) organizacija naučnih, stručnih i drugih konferencija, radionica, okruglih stolova, tribina, javnih predavanja, promocija, seminara, istraživačkih radova, konferencija za novinare i dr. o temama koje se odnose na prava djeteta;
 - i) publikovanje rezultata istraživanja, analiza i drugih sadržaja koji se odnose na promociju i zaštitu prava djeteta;
- (2) Vijeće za djecu posebno je zaduženo za praćenje primjene Akcionog plana za djecu Bosne i Hercegovine (2011 – 2014) i obavezno godišnje izvještavanje Vijeća ministara o njegovoj primjeni, predlaganje mjera za unapređenje primjene, predlaganje eventualnih izmjena i dopuna i sačinjavanje nacрта novog Akcionog plana u cilju nastavka kontinuiranih aktivnosti nakon 2014. godine.
- (3) Članovi Vijeća za djecu imenovani od strane uključenih ministarstava i agencija, u skladu sa svojim nadležnostima, koordiniraju razmjenu informacija, dostavu podataka iz oblasti koja je iz nadležnosti njihove institucije, a odnosi se na njihova prava.

Član 3. (Sastav Vijeća za djecu)

- (1) Vijeće za djecu se sastoji od trinaest (13) članova koji se imenuju na period od četiri godine, sa pravom imenovanja za još jedan mandat u istom trajanju.
- a) U sastav Vijeća za djecu imenuje se osam (8) članova iz reda državnih službenika, dva (2) člana iz reda nevladinih organizacija i tri (3) člana iz reda akademske zajednice.
 - b) Iz reda državnih službenika članovi Vijeća za djecu su državni službenici koji su u okviru svojih poslova zaduženi da direktno ili indirektno provode aktivnosti na promociji, zaštiti, izvještavanju i unapređenju interesorne, regionalne i međunarodne saradnje u oblasti dječijih prava.
 - c) Članovi Vijeća za djecu iz reda nevladinih organizacija su predstavnici mreže nevladinih organizacija „Snažniji glas za djecu“ koji imaju zapažene rezultate u oblasti promocije i zaštite prava djece u Bosni i Hercegovini.
 - d) Članovi Vijeća za djecu iz reda akademske zajednice su profesori, javni djelatnici, koji imaju iskustva u naučno-istraživačkom radu i izradi državnih strategija i drugih dokumenata iz oblasti dječijih ljudskih prava.

- (2) Prilikom izbora članova Vijeća za djecu vodit će se računa o adekvatnoj obrazovno-profesionalnoj, nacionalnoj, regionalnoj, starosnoj i spolnoj zastupljenosti.
- (3) Sastancima Vijeća za djecu, u svojstvu prijatelja djece, mogu prisustvovati: donatori, predstavnici domaćih i međunarodnih institucija i organizacija, ambasada akreditiranih u BiH, naučnih institucija, vjerskih zajednica, ukoliko su zainteresirani ili su inicijatori i finansijeri aktivnosti koje se odnose na zaštitu i promociju dječijih prava, ali oni nemaju svojstvo članova Vijeća za djecu.

Član 4.

(Imenovanje članova Vijeća za djecu)

- (1) Na prijedlog Ministarstva za ljudska prava, Vijeće ministara donosi Odluku o imenovanju članova Vijeća za djecu, vodeći računa o dosadašnjoj uključenosti imenovanih u oblasti promocije i zaštite dječijih prava, stručnosti, iskustvu i organizacionim zaduženjima za poslove u vezi sa pravima djeteta, a u skladu sa članom 3. ove Odluke.
- (2) U sastav Vijeća za djecu članove predlažu:
 - a) Ministarstvo za ljudska prava dva člana od kojih jedan predsjedava Vijećem za djecu;
 - b) Ministarstvo civilnih poslova Bosne i Hercegovine jednog člana;
 - c) Ministarstvo sigurnosti Bosne i Hercegovine jednog člana;
 - d) Ministarstvo pravde Bosne i Hercegovine jednog člana;
 - e) Ministarstvo vanjskih poslova Bosne i Hercegovine jednog člana;
 - f) Agencija za predškolsko, osnovno i srednje obrazovanje Bosne i Hercegovine jednog člana;
 - g) Agencija za ravnopravnost spolova Bosne i Hercegovine jednog člana;
 - h) Mreža nevladinih organizacija „Snažniji glas za djecu“ dva člana;
 - i) Akademska zajednica tri člana - univerziteti u Sarajevu, Mostaru i Banjoj Luci.
- (3) Zamjena članova Vijeća za djecu vrši se na temelju pismenog akta nadležne institucije koja predlaže zamjenu.
- (4) Radom Vijeća za djecu koordinira Ministarstvo za ljudska prava i predlaže predsjednika Vijeća za djecu.

Član 5.

(Predsjedavanje, način rada, prava i obaveze članova Vijeća za djecu)

- (1) Sjednicama Vijeća za djecu predsjedava predsjednik koga predlaže Ministarstvo za ljudska prava.
- (2) Na prvoj sjednici Vijeća za djecu biraju se dva zamjenika predsjednika. Predsjednik i njegova dva zamjenika ne mogu pripadati istom konstitutivnom narodu.

- (3) Prava, obaveze i način rada Vijeća za djecu bliže će se urediti Poslovníkom o radu Vijeća za djecu (u daljem tekstu: Poslovník). Poslovník donosi Vijeće za djecu u roku od trideset (30) dana od dana konstituiranja.
- (4) Vijeće za djecu će početi sa radom odmah nakon donošenja Odluke o imenovanju članova Vijeća za djecu.

Član 6.

(Administrativna, stručna i tehnička pomoć Vijeću za djecu)

- (1) Administrativne, stručne i tehničke poslove za potrebe Vijeća za djecu, do uspostavljanja odgovarajućeg Odjela za prava djeteta, obavlja Sektor za ljudska prava Ministarstva za ljudska prava, na način koji utvrdi ministar za ljudska prava, a neposredno će realizirati resorni pomoćnik ministra.
- (2) Dio administrativnih, finansijskih i tehničkih poslova i usluga za potrebe Vijeća za djecu obavlja Sektor za opće, pravne i finansijsko-materijalne poslove u skladu sa podzakonskim aktima Ministarstva za ljudska prava.

Član 7.

(Stručna i radna tijela Vijeća za djecu)

U cilju efikasnijeg izvršavanja svoje uloge, Vijeće za djecu može oformiti stalna ili povremena radna tijela (komisije, timove, ekspertske i druge radne grupe, forume, redakcije ili angažirati stručne osobe za pojedine konkretne zadatke. Kriteriji i način formiranja ovih radnih tijela bliže će se regulirati Poslovníkom, a izvori finansiranja će se tražiti u donatorskim sredstvima.

Član 8.

(Finansiranje)

- (1) Rad Vijeća za djecu finansira se iz budžeta Institucija Bosne i Hercegovine, koji se planira u budžetu Ministarstva za ljudska prava.
- (2) Aktivnosti Vijeća za djecu mogu se finansirati iz donatorskih sredstava putem posebnih programa i projekata. Realiziranje ovih programa i projekata odobrava ministar za ljudska prava i potpisuje ugovor sa ovlaštenim predstavnikom donatora na inicijativu Vijeća za djecu.
- (3) Vijeće za djecu u okviru godišnjeg plana rada planira finansijska sredstva, izvore, strukturu, kriterije rada i druga pitanja važna za rad i djelovanje Vijeća za djecu u skladu sa važećim finansijskim pravilima u institucijama Bosne i Hercegovine.
- (4) Članovi Vijeća za djecu imaju pravo na naknadu putnih troškova za dane kada prisustvuju sjednicama Vijeća za djecu izvan mjesta prebivališta, obračunatu na osnovu vrijednosti pojedinačne karte utvrđene linijskim prijevozom, na relaciji mjesto prebivališta člana – mjesto održavanja sjednice Vijeća.

(5) Članovi Vijeća imaju pravo na naknadu troškova smještaja (noćenja) za dane kada prisustvuju sjednicama Vijeća izvan mjesta prebivališta u visini stvarnih troškova.

(6) Naknada iz stava (4) i (5) isplaćuje se na teret budžeta Ministarstva za ljudska prava.

Član 9.
(Podnošenje izvještaja o radu)

Izvještaj o radu Vijeće za djecu podnosi Vijeću ministara jednom godišnje, a po potrebi i češće.

Član 10.
(Prelazne odredbe)

Stupanjem na snagu ove Odluke prestaje da važi Odluka o formiranju Vijeća za djecu Bosne i Hercegovine („Službeni glasnik BiH“, broj 72/07).

Član 11.
(Stupanje na snagu)

Ova Odluka stupa na snagu danom donošenja i objavljuje se u „Službenom glasniku BiH“.

VMbroj:242/12

Sarajevo, 4. 12. 2012. godine

Predsjedavajući
Vijeća ministara BiH
Vjekoslav Bevanda

Ova Odluka je objavljena u „Službenom glasniku BiH“ broj 4/13

OBRAZLOŽENJE

I – PRAVNI OSNOV

Pravni osnov za donošenje ove Odluke je sadržan u članu 17. Zakona o Vijeću ministara Bosne i Hercegovine („Službeni glasnik BiH“, br. 30/03, 42/03, 81/06, 76/07, 81/07, 94/07 i 24/08), kojim je predviđeno da Vijeće ministara Bosne i Hercegovine donosi odluke u svrhu izvršenja svojih obaveza.

II – RAZLOZI ZA DONOŠENJE ODLUKE

Ova Odluka predložena je u cilju implementacije obaveza koje su utvrđene Konvencijom o pravima djeteta i pratećim protokolima kao i drugim međunarodnim instrumentima iz oblasti ljudskih prava u skladu sa Ustavom Bosne i Hercegovine i instrumentima koji su ratificirani od strane Bosne i Hercegovine, a posebno u cilju praćenja provođenja Akcionog plana za djecu Bosne i Hercegovine 2011 – 2014 (u daljem tekstu: Akcioni plan).

UN Komitet za prava djeteta je u svojim zaključnim razmatranjima od 1. oktobra 2010. preporučio Bosni i Hercegovini da odmah aktivira uspostavu Vijeća za djecu BiH u okviru Ministarstva za ljudska prava i izbjeglice Bosne i Hercegovine.

Ministarstvo za ljudska prava je u skladu sa zaključcima Vijeća ministara BiH sa 151. sjednice, održane 25. 5. 2011. godine, preporuke Komiteta UN za prava djeteta ugradilo u Prijedlog akcionog plana koji je usvojen od strane Vijeća ministara BiH na 155. sjednici, održanoj 13. 7. 2011. godine.

Odluku o formiranju Vijeća za djecu Bosne i Hercegovine („Službeni glasnik BiH“, br. 72/07) bilo je potrebno izmijeniti zbog neslaganja entiteta Republike Srpske u pogledu nadležnosti ovog tijela, te da je navedenom Odlukom Vijeće za djecu pretvoreno u političko tijelo. Iz tih razloga pripremljena je ova Odluka kojom će Vijeće za djecu imati status stručnog, interresornog, savjetodavnog i koordinirajućeg tijela Vijeća ministara Bosne i Hercegovine. Napominje se da je ranija Odluka predviđala uključivanje većeg broja članova (30) što je predstavljalo izuzetno visok finansijski izdatak, te je Ministarstvo za ljudska prava ovom Odlukom predložilo racionalniji pristup, predlažući da koordinaciju sa entitetima preuzmu ostala nadležna državna ministarstva (npr. Ministarstvo pravde BiH sa entitetskim ministarstvima pravde, Ministarstvo sigurnosti BiH sa entitetskim MUP-ovima itd.) čime se osigurava sistem koordinacije za državni nivo i istovremeno putem resornih ministarstava sa entitetskim ministarstvima.

III – FINANSIRANJE

Vijeće ministara je na 117. sjednici, održanoj 25. 3. 2010. godine, donijelo Odluku o okvirnim kriterijima za isplatu novčane nagrade zaposlenima u institucijama BiH („Službeni glasnik BiH“, broj 31/10). Članom 2. stav (3) predmetne Odluke precizirano je da je jedan od kriterija za dodjelu novčane nagrade – stimulacije zaposlenima u institucijama BiH i rad u radnim tijelima koji obavljaju poslove međuresorne koordinacije.

Članovi Vijeća za djecu imenovani iz reda nevladinih organizacija i akademske zajednice mogu ostvariti pravo na novčanu naknadu za rad u Vijeću za djecu, shodno njihovim internim aktima kojim su ih predložile u Vijeće za djecu.

U cilju realizacije ove Odluke nije potrebno osiguravati druga posebna sredstva za 2012. godinu, jer je planiran nastavak saradnje sa UNICEF-om koji je pružio i pruža podršku u svim akcijama koje se poduzimaju u Bosni i Hercegovini u cilju implementacije Konvencije o pravima djeteta, kao i drugim međunarodnim organizacijama.

Također, potpisan je Akcioni plan Programa za Bosnu i Hercegovinu 2010 – 2014 između Vijeća ministara BiH i UNICEF-a.